



ル 6
2529
40



門牌
號 2529
卷 49-40



吉林通志卷一百四

人物志三十三

國朝十八

圖海

果斯海

根特

莽奕祿

武穆篤

宏世祿

邁圖

伊巴罕

額赫納

鄂泰

珠滿

哈山

碩岱

諸父庫禮

莫洛

格斯泰

薩布素

吉林通志卷一百四

圖海姓馬佳氏世居綏芬隸滿洲正黃旗天資忠懇有文武才順治二年由筆帖式游歷國史院侍讀八年擢秘書院學士明年

恩詔予騎都尉世職十年授文館大學士列議政大臣十二年加太子太保署刑部尙書明年考滿加少保十五年與大學士巴哈納等校訂律例尋坐鞫江南考試作弊事遲延削加銜明年侍衛阿拉那等相毆事具武拉禪傳刑部審理未允被

詰問不以實對下廷臣議坐死得

旨寬免罷職十八年

世祖上賓遺命起用

聖祖嗣位授本旗滿洲都統康熙二年流賊郝搖旗劉體純

李來亨等竄據湖廣鄖襄山中

命爲定西將軍副靖西將軍都統穆里瑪率禁旅會楚蜀兵討之至與總督李國英提督鄭蛟麟總兵俞奮起于大海署護軍統領根特等連營扼之賊兵三千犯奮起營援擊敗去旣連犯諸營各分兵夾擊賊潰走未幾副都統杜敏擒郝搖旗於黃草壩斬之劉體純亦相繼破惟李來亨擁眾據茅麓山恃險未下率兵圍焉外援絕而餘寇亦搜剿略盡賊勢窮蹙來亨自經

死降偽官及兵眾四千有奇師還晉世職一等輕車
都尉六年授宏文院大學士充纂修

世祖實錄總裁官明年

命測儀象八年

命錄刑部重囚並稱

旨明年乞解機務專力戎行

聖祖慰留之十一年

命清理刑獄明年冬吳三桂反十三年耿精忠亦反

聖祖簡才籌餉

命署戶部尙書明年春疏請

敕各行省軍需不得私派夫役不得先期拘集定額外不得
苛斂錢糧詞訟重者速審速結小者不得濫准衙蠹
土豪不得魚肉良善得

旨允行察哈爾部布爾尼劫其父阿布柰以叛

命爲副將軍同撫遠大將軍信郡王鄂扎率師往討師次達
祿布爾尼伏兵山谷而自迎戰兩軍接伏發土默特
兵爲所撓分拒之賊騎四百繼至力戰殲焉布爾尼
悉眾以火器來攻嚴陳以待時其隙擊之賊敗復聚
躬督護軍統領哈克山副都統吳丹等猛進賊敗潰
布爾尼僅以三十騎遁招撫人戶千三百餘而科爾

沁額駙沙津方以兵來會遇布爾尼遁經扎魯特境
追斬之察哈爾平凱旋

聖祖御南苑大紅門迎勞之論功晉一等男爵十五年貝勒
洞鄂攻叛將王輔臣於平涼未克

命爲撫遠大將軍率師討之洞鄂以下並受節制既至諸將
請急攻曰賊固在掌握中但生靈數十萬皆

朝廷赤子爲賊所劫覆巢之下必多殺傷緩之俟計窮出降
仰體

聖主好生之德不亦美乎平涼城北虎山墩高數十仞賊守
以精兵與城中犄角且通西北餉道於是令諸將曰
得此墩城不攻自下矣率兵仰攻賊萬餘環列火器
以死拒戰兩時許我軍番進斬僞總兵二賊被殪及
墜崖死者無算遂奪其墩據之城中舉動目之了然
輔臣懼乞降以

聞

詔赦其罪令副都統吳丹入城撫定秋毫無所犯振流亡掩
胔骼奏蠲被兵及轉餉各州縣賦從之遣振武將軍
佛尼埒敗賊將吳之茂於牡丹園等處將軍穆占攻
樂門敗賊於紅崖復禮縣僞固原巡撫陳彭及慶陽
總兵周養民嘉峪關總兵王好問關山副將孔蔭雄

四
等僞官九百餘兵四萬八千有奇先後降關隴悉平
詔曰圖海器識老成才猷練達贊襄機務宣力

累朝以文武長才兼忠愛至性勞績茂著克副委任朕心嘉
悅可晉封三等公世襲罔替當是時平涼慶陽初定人心
未甯而漢中興安賊猶據守分兵防諸要隘別遣一
旅赴湖廣會剿吳逆

詔率精銳親行奏陳陝西反側未安恐有變

聖祖因令留鎮授穆占爲都統佩征南將軍印率師赴楚冬
議取漢中興安檄提督孫思克赴秦州趙良棟赴鳳
翔而將軍侯張勇王進寶各引軍助之期明年正月

進兵

詔下勇等會議以

聞勇等言宜視夏秋收穫豐歉再圖進取圖海以漢興山路
險峻夏秋多霖潦賊守宜堅請如前奏明年正月議
上

聖祖慮克復漢興守兵益增轉餉不易若俟夏秋糜餉以老
師亦屬非計

詔守要隘分兵赴荊州會剿吳逆由是議寢尋招撫韓城等
縣降僞總兵喬斌以下官百餘遣兵逼禮縣益門先
後敗賊五盤山喬家山復塔什堡秋

賜服物並

御製詩二章十七年春奏分兵兩路取漢興

密詔止之慶陽袁本秀受吳逆僞札作亂遣兵會王進寶討之斬本秀於衛遠溝餘眾潰散冬請入京面奏事宜許之明年春還陝夏賊犯棧道益門鎮各口奏以提督趙良棟進兵臨武寨相機而行會湖南廣西平

詔急殲寶雞之賊恢復漢興以平蜀地尋破益門鎮賊毀偏橋兵不能進疏其狀以

聞

詔嚴趣之秋取漢中興安分兵四路自率將軍佛尼埒等趨

興安總兵陳福亮爲後援將軍畢力克圖提督孫思克等由略陽進總兵朱衣客爲後援將軍王進寶總兵費雅達等由棧道趨漢中總兵高孟爲後援提督趙良棟由徽縣進剋日並發圖海師次鎮安縣分兵爲二攻僞總兵王遇隆於火神崖敗之渡乾玉河奪梁河關僞將韓晉卿遁四川進寶復漢中良棟復徽縣略陽畢力克圖復成縣階州大軍進自梁河關復興安降僞將軍謝四總兵王永世以下官三百八十餘兵萬四千有奇而平利紫陽石泉漢陰洵陽白河及湖廣竹山竹溪上津等縣皆下畢力克圖復遣參

將康調元復文縣降偽洮岷道王文衡先是進寶良棟捷奏先至

聖祖以圖海畢力克圖遲緩切責之捷聞得

溫旨下部議功尋

命駐守鳳翔明年春

詔赴漢中轉餉濟蜀師其秋陝西總督哈占溯保甯江擊賊譚宏

命發兵爲聲援以分賊勢初康熙十二年姦民楊起隆詐稱朱三太子謀作亂京師正黃旗周公直家奴陳益要

姦徒十人於家將應之公直首其事圖海時兼正黃旗都統率兵圍之陳益等就縛至是獲起隆送京師二十年春賊犯四川敘州等處遣副都統翁愛往援仍奏請親行

詔駐漢中可兼顧秦蜀秋以疾還京師尋具疏乞休

聖祖慰留之其冬卒累官太子太傅中和殿大學士兼吏部尙書三等公爵

賜祭葬如典禮加祭二次諡日文襄明年

太宗實錄告成嘗充監修總裁官追贈少保仍兼太子太傅二十二年

御製碑文立於墓道雍正二年加贈一等忠達公配享

太廟尋

命建專祠

御製文勒石旌之崇祀陝西名宦子諾敏襲爵官至禮部尙書圖海御軍於趨事赴功迹近濡滯而不務一切期於有成

聖祖以老成稱之知人則哲能官人豈不信哉

果斯海姓納喇氏世居葉赫父阿拜

太祖時來歸後隸滿洲正紅旗順治七年果斯海由工部筆帖式累遷員外郎尋擢工部給事中十八年疏請入

旗於京城各門外分設教場練習士馬得

旨如所請行又疏陳五事一輔政四大臣應定祿品與職任相稱一督撫大吏應遴才委任無分漢軍漢人一軍政黜陟宜公平一文武官品級宜畫一一要地城守軍器請停遣部臣巡察嚴責所司覈報至步兵虛額應卽充補亦令各專轄大臣造冊送部得

旨所奏更定輔臣祿品一款不必議餘下所司議行康熙七年疏言民兵服色僭濫及一切關風化者請嚴行飭禁各佐領下戶口請以贏絀定賞罰又請減省重複案牘以歸簡要下所司議行九年遷內閣侍讀學士

充纂修

玉牒官轉太常寺少卿預纂

太祖

太宗聖訓十一年遷內閣學士充重修

太宗實錄副總裁官十四年擢兵部侍郎充

經筵講官明年山東提督周卜世疏劾巡撫達爾布徇庇屬

員侵漁百姓達爾布亦劾卜世挾讐構陷請遣官質

之奉

命往勘達爾布違例脅眾建立生祠事實坐褫職十六年調

倉場侍郎十七年擢左都御史疏請滿洲蒙古朝鮮

人毋許賣與漢軍漢人八旗各佐領下出賣人口毋

許出本佐領外應著爲禁令

詔從之尋遷兵部尙書時軍興急度支以才

特命兼理戶部事二十年調禮部尙書其秋

詔刑部民命所關必精明幹練始克勝任果斯海向在兵部

才能素著其以禮部尙書銜管理刑部事明年冬卒

遣內大臣奠茶酒

賜祭葬如故事諡日文敏果斯海之居諫院言遴才無分漢

軍漢人言禁民兵服色僭濫已無忝厥官至減省案

牘尤有味其言之也案牘之繁有一事十數轉而積

紙盈尺者稽時滋費而弊緣以生於是吏胥爲政天下事益冗不可治其請歸簡要旨哉言乎

根特姓瓜爾佳氏世居尼馬察父尼努

太祖時與兄尼唐阿率眾來歸並任佐領後隸滿洲鑲藍旗
尼努事

太宗以能予騎都尉世職天聰八年隨副都統巴奇蘭征虎爾哈部有功兼一雲騎尉卒根特襲尋任刑部理事官順治元年署前鋒參領隨睿親王多爾袞入山海關敗流賊李自成黨唐通於一片石追自成至望都復敗之偕前鋒參領阿爾布尼討馬騰口土賊撫定

其餘論功晉世職輕車都尉四年授協領駐防西安
時王光泰叛據鄖陽

詔侍郎喀喀木率禁旅自河南進討並調西安駐防兵根特率以往破賊黨甄以鍾於房縣師旋擊賊方國成於谷口敗之六年姜瓖叛大同所在多陷隨總督孟喬芳侍郎額色統軍渡河討賊連復蒲州臨晉河津進窺平陽賊黨白璋引步騎六千阻滎河拒戰偕副將趙光瑞等力擊大破之逐北至黃河賊未及濟遽前薄之溺死者無算斬白璋餘賊竄孫吉鎮悉殲焉移師猗氏僞監軍衛登芳依山結寨與賊黨張萬全相

犄角分兵擊萬全斬之殲其眾乘勝薄登芳寨陳斬
偽將王國興等擒登芳進聞喜敗偽都督郭中傑兵
於侯馬驛追奔三十里斬獲無算九年還京以功兼
遇

恩詔晉世職一等兼一雲騎尉明年隨貝勒屯齊征湖廣時
孫可望馮雙禮白文選等據武岡我軍自永州趨寶
慶賊眾十餘萬扼險以拒兩軍接以驍騎突之賊陳
亂我正黃正紅二旗兵戰賊方急馳與夾擊賊大敗
師進武岡賊騎千餘來犯復敗之十一年隨甯海大
將軍伊爾德征浙江舟山以右翼敗阮思陳六御兵

獲其戰艦及紅衣礮舟山平明年論湖廣功晉男爵
署本旗副都統十四年論舟山功晉爵一等明年擢
本旗蒙古都統康熙十六年遷本旗滿洲都統列議
政大臣二十三年以老病乞休三十二年卒

賜祭葬如故事諡曰襄壯子格圖肯襲

莽奕祿姓富察氏先世居葉赫祖阿布岱以功予騎
都尉世職隸滿洲鑲白旗

世宗時擡入正白八旗之次

國初設黃白紅藍四旗後增四鑲尋以兩黃正白爲上
三旗由是觀之鑲不先正可知或稱上三旗曰鑲黃

正黃正白特取便文非八旗卽以是爲次也順治元年莽奕祿襲職七年九年三遇

恩詔晉世職二等輕車都尉十一年以署參領隨靖南將軍

珠瑪喇征廣東時明桂王朱由榔將李定國步騎四萬據新會縣之山峪列礮象爲陳我軍追擊陳潰其別將以騎四千自山巔馳下又逆敗之定國走廣西師旋以功晉世職一等康熙元年授護軍參領十三年吳三桂反署護軍統領隨大軍赴湖廣征之十五年軍次石首縣進太平街賊四千餘來拒偕護軍統領伊勒都齊敗之斬百餘級又隨貝勒察尼追敗之

斬三百餘級十七年擢鑲白旗蒙古副都統十九年隨征南將軍穆占進兵貴州復靖遠清平及平越府時三桂子世璠據貴陽而僞將軍韓天福據新添衛偕前鋒統領薩克察率驍騎先擊天福殪賊千餘乘勝復龍里縣進薄貴陽世璠遁克之並定所在城衛明年春趨平遠州賊將高起隆夏國相王會等以眾二萬據城西南山偕副都統花色等與戰殪賊四百有奇進攻其城自午至酉再接再勝斬級千餘王會降起隆等遁復平遠降僞官三百四十兵三千有奇同遊擊王成功躡逸賊連敗之多所斬馘復黔西大

定諸城擒偽巡撫張維堅遂入雲南與大將軍賚塔
軍會曲靖調滿洲副都統

命參贊軍務冬世璠自殺雲南平還京故事累功牌六則晉
職所得五不及敘二十二年遷護軍統領管佐領明
年擢鑲白旗蒙古都統尋調滿洲三十年授荊州將
軍四十二年以老乞休

允之時

聖祖幸塞外因赴

行在

賜御書引年老將額

御衣一襲東珠頂帽孔雀翎班於內大臣其秋卒年七十
賜祭葬如故事諡敏肅子色爾敏襲

世宗御極

恩詔下部察功牌闕一者咸與敘於是莽奕祿追兼一雲騎
尉且擡其旗擡旗異數也武穆篤者殆族人而遠近
未詳自有傳

武穆篤葉赫富察氏祖穆哈連天聰時來歸隸滿洲
鑲黃旗武穆篤順治十五年以護軍參領隨信郡王
多尼征明桂王朱由榔由貴州趨雲南擊敗其將李
成蛟於涼水井李定國於雙河口進至盧噶定國復

列象陳以拒力戰敗之逐北至磨盤山予雲騎尉世職十八年隨大軍討山東土賊有功康熙八年擢前鋒參領十三年耿精忠反福建

詔貝子傅拉塔爲甯海將軍武穆篤爲前鋒統領由浙江進討冬次台州賊將會實陳理營黃瑞山欲來犯偕副都統吉爾塔布提督塞白理與戰敗之進至蒲塘又連敗僞總兵吳臣將軍楊德明年趨涼蓬隘口敗賊伏兵賊夜遁偕諸將追擊於黃土嶺賊退據黃巖縣進圍之賊帥曾養性遁降僞官二十兵三千復其城次上塘嶺養性糾僞都督馬士玉張廣文等水陸兵

三萬拒戰率所部爲軍鋒突入賊陳大破之斬僞官六十賊眾無算復太平樂清青田三縣及大荆盤石二衛而身亦被數創明年大軍發處州至雲和縣石塘嶺地當温州入閩之衝賊據險死守副都統沃申總兵陳世凱攻其前綴賊偕諸將乘大霧直搗賊巢破之十七年創發卒於軍喪還

遣領侍衛內大臣奠茶酒十九年

聖祖以功績茂著

特命照實授前鋒統領例議卹晉世職騎都尉

賜祭葬如故事謚襄壯子綳色襲雍正七年入祀昭忠祠

宏世祿姓瓜爾佳氏世居瓦爾喀祖噶錫屯

太祖時率眾來歸任佐領後隸滿洲鑲紅旗順治十一年宏世祿由佐領授護軍參領十八年隨定西將軍愛星阿征雲南師至緬甸阿瓦城獲明桂王朱由榔康熙三年予雲騎尉世職十二年擢本旗蒙古副都統十四年察哈爾部布爾尼叛信郡王鄂札副將軍圖海率師討之

命與護軍統領哈克山副都統烏丹參贊軍務軍次達祿布爾尼設伏山谷躬自拒戰率右翼與諸將分進伏發因夾擊之殲其眾布爾尼悉潰眾復出再戰再北以

三十騎遁師還晉世職輕車都尉明年調滿洲副都統十九年

命與都統瑪奇趙璉副都統祖植椿率兵往廣西參贊大將軍賚塔軍務征雲南逆孽吳世璠偽將軍何繼祖以眾萬餘扼石門坎與諸將攻奪之復安龍所城進軍黃草壩偽將軍詹養王有功等九人踞守率所部爲軍鋒鏖戰自卯至酉殪賊二千有奇乘勝復馬龍州易龍所楊林城有賊屯渾水塘與嵩明州相犄角遣營總顧塔幹都海等攻嵩明州克之渾水塘賊棄營夜遁進壁歸化寺冬世璠自殺雲南平二十三年甄

別八旗諸臣坐不能攝下應禡

聖祖以年老免議尋乞休

允之二十七年卒

賜祭葬如故事子龍科襲其雲南之功未敘史闕之矣

邁圖姓佟佳氏世居哈達父烏進

國初來歸任典儀順治五年邁圖以二等侍衛從征山東破賊踞齒牙山巖十五年隨信郡王多尼征明桂王朱由榔至貴州連破其將李成蛟李定國康熙十三年授營總兵從康親王傑書征逆藩耿精忠明年大軍自仙居趨黃巖僞都督劉秉仁以眾萬餘拒戰

半山嶺偕副都統吉勒塔布力擊敗之殪二千有奇十五年戰建陽縣敗賊三千餘明年鄭錦遣其總督趙德勝將軍何祐等以眾四萬據興化營城西北太平山者二十有六伏賊萬餘於白茅山爲援隨甯海將軍拉哈達先攻白茅山之伏其眾潰走太平山躡擊連破其營陳斬得勝復興化祐退泉州進拔之十七年隨平南將軍賚塔攻劉國軒吳淑等於蜈蚣山破其七營復長泰縣二十五年授本旗蒙古副都統兼佐領二十九年署前鋒統領隨裕親王福全征厄魯特部噶爾丹戰烏蘭布通陳沒

賜祭葬如故事

特旨加祭一次諡曰忠毅初予雲騎尉世職三十年追論所

累戰功晉輕車都尉子瑪喇襲

伊巴罕姓格濟勒氏世居雅蘭後隸滿洲正白旗伯

父舒球天聰八年隨副都統薩木什克巴奇蘭等征

黑龍江有功授騎都尉世職卒無子以伊巴罕襲初

任三等侍衛改刑部郎中兼佐領順治七年九年三

遇

恩詔晉世職至二等輕車都尉十八年署參領隨定西將軍

愛星阿征明桂王朱由榔於緬甸緬人以由榔獻康

熙十四年任護軍參領隨定南將軍希爾根討逆藩
耿精忠師至江西僞都督易天錫據建昌府率兵攻
之大敗賊眾既而撫州賊來援逆擊之卻去城中僞
將軍邵連登僞總兵李茂珠等復出戰又敗之尋與
護軍統領桑額攻復新昌縣擒斬僞總兵朱一典及
賊黨無算明年擢本旗蒙古副都統隨安親王岳樂
討逆藩吳三桂擊敗其僞將軍夏國相等復萍鄉縣
十八年隨征南將軍穆占討三桂遺孽世璠師自衡
州進武岡賊將以二萬眾營楓木嶺死拒率所部大
破之明年擢前鋒統領二十二年授

盛京將軍二十四年

召還仍任前鋒統領論江西湖廣戰功積晉世職一等兼一雲騎尉年老致仕卒子蘇完任改襲輕車都尉以前吏部敘

恩詔過濫云

額赫納姓納喇氏祖蘇巴海

國初自葉赫來歸隸滿洲鑲藍旗父渥和訥任佐領額赫納襲職順治初任護衛遷護軍參領十四年隨甯南靖寇將軍貝勒洛託征雲南康熙元年隨靖東將軍濟席哈平山東土賊于七並有功十一年擢本旗

蒙古副都統尋駐防兗州十四年逆藩耿精忠分犯

江西

詔簡親王喇布爲揚威大將軍由江甯移鎮額赫納參贊軍務明年春麻姑山賊王永召等犯會城偕副都統席布擊敗之初叛鎮馬雄結滇賊王宏勳擾廣東

聖祖命簡親王卽副都統額赫納巴爾堪擇一爲將軍統兵往援王舉額赫納

命倍道速進未至平南王尙可喜病子之信以韶州南雄應賊連閩粵諸寇謀犯贛州於是退守南贛賊屯蓮塘口擊斬僞將黃輝陳可相敗其眾進軍芝坪擊敗僞

總兵吳漢興焚賊營二十餘其冬廣東提督嚴自明反陷南康進圍信豐偕副都統穆成格援之擒斬萬餘自明走南安信豐圍解十六年

命莽依圖爲鎮南將軍以額赫納參贊軍務赴粵抵韶州之信反正自明亦獻南安降偕江甯將軍額楚分擊逆藩吳三桂僞將馬寶王錦等營於韶州城下破走之廣西巡撫傅宏烈兵單莽依圖疏以額赫納赴梧州與合

詔如所請明年調滿洲副都統廣東總兵祖澤清據高州反命回勦軍次電白賊悉精銳以拒陳斬僞總兵江瓊等殪賊四千餘賊黨王得功以城降進軍高州澤清挈家遁十八年會莽依圖軍於貴縣由橫州趨南甯勦賊渠吳世琮戰新村世琮中流矢以二十騎遁

詔速殄餘黨進取雲南冬調護軍統領明年大軍進貴州於陶登遇僞將軍范齊韓馬承烈逆戰同都統貝勒希福分路擊敗之斬獲無算二十一年以前鋒攻奪安籠所黃草壩偕希福破賊曲靖府羅平州界拔二十二營多所斬獲雲南平凱旋二十三年調前鋒統領明年授滿洲都統尋列議政大臣二十九年噶爾丹侵喀爾喀部內犯

命同侍郎溫達等由歸化城分路偵禦會為裕親王福全所

敗遁去還京三十五年以老乞休

允之四十四年卒

賜祭葬如故事迹其戰功例宜得世職史未詳也

鄂泰姓瓜勒佳氏世居蘇完隸滿洲正白旗順治四年從征百戶所先登克其城予騎都尉世職七年從征江西先登克九江府

賜號巴圖魯晉世職二等輕車都尉九年授

盛京副理事官坐事罷任削世職起授參領康熙十年

擢

盛京副都統十三年王輔臣反陝西定西大將軍貝勒

洞鄂奉

命討之

詔鄂泰率盛京兵一千來京明年

敕以陝西沿邊有路通山西汾州逆賊或乘隙來犯其授鄂

泰建威將軍率所領盛京兵往駐太原防守夏

命赴西安參贊軍務其建威將軍印以副都統烏丹代時輔

臣說連川賊偕署副都統阿爾瑚扼寶雞縣棧道既而川賊李冉二姓出犯九龍山合擊盡之而偽總兵任德望等率賊眾及猓猓七千餘來援營益門鎮者

七與阿爾瑚分九路進攻閱兩時許悉破其營德望以百騎遁驍騎校韓楚漢追射中其股降之斬獲甚夥十五年殲餘賊紅崖堡

詔嘉其功下部優敘明年卒於軍二十五年追授騎都尉兼一雲騎尉世職子鄂山襲

珠滿姓瓜爾佳氏祖多和倫自烏拉歸

太祖隸滿洲正白旗從征明廣甯錦州有功予雲騎尉世職次子額赫瑪瑚以侍衛從征鄭成功戰廈門陳沒

卹贈雲騎尉世職無子以兄子嗣襲卽珠滿也洵官參領康熙十三年逆藩耿精忠反江西應吳三桂隨征南將

軍尼雅翰討之擊敗賊眾犯南康者又敗他賊於沔津十五年從復吉安破賊眾惶恐灘明年隨鎮南將軍莽依圖征廣東次韶州僞將軍馬寶等渡河來犯大軍分拒之率右翼力戰連破賊寶等宵遁十八年進兵廣西破賊將吳世琮於南甯新村明年討柳州叛賊馬承烈道出陶登擊賊黨范齊韓等其冬隨征南大將軍賚塔征雲南二十年春連擊敗賊將何繼祖王宏勳於石門坎黃草壩進薄雲南城陳斬僞將軍胡國柄隨都統希福追馬寶及巴養元於烏木山賊潰降是年雲南平凱旋積功晉世職騎都尉兼一

雲騎尉授侍衛尋擢護軍參領兼管火器營事調前鋒參領三十六年擢荊州副都統三十九年奉

命會勦四川逆蠻比至都統滿丕提督康希順已復打箭鑪因駐守鴉隴江四十一年還荊州其秋鎮筸紅苗作亂

聖祖命尙書錫勒達等統師撫勦

詔珠滿久經戰陳軍事與商酌而行冬撫降三百一寨惟天星寨負固不下錫勒達與提督俞益謨分四路攻之別率兵爲應克其寨苗竄葫蘆寨復攻克之斬馘無算四十五年擢江甯將軍明年春

聖祖南巡

賜紫貂冠服及良馬尋卒於官

賜祭葬如故事吏部請以其子撤木貝襲騎都尉兼雲騎尉詔珠滿奮迹戎行勞績茂著眾所共知其世職加一雲騎尉合爲輕車都尉俾其子承襲

哈山姓富察氏世居訥殷隸滿洲鑲黃旗順治十四年由官學生授鼓廳筆帖式遷刑部主事康熙二十一年監督九江關稅務疏請移關湖口縣

允之明年遷兵部員外郎尋調吏部二十三年御試八旗文學之臣繙譯

御製竹賦與試者通政使以下筆帖式以上五百餘員

聖祖以滿漢文義爛否親甲乙之哈山列一等擢右諭德明年轉左二十九年遷內閣侍讀學士再遷內閣學士左副都御史三十六年遷

盛京禮部侍郎四十二年疏言臣部所役網戶採牧校尉等八百二十五人其無力婚娶者百六十有奇以無室家往往不務生計逃避官差請發

盛京戶部銀四萬兩照公庫例派員經理一分生息以六年爲期本還戶部息銀可二萬八千餘兩陸續給無妻壯丁完娶人五十兩餘銀仍以生息久遠有益

下部議從之四十九年遷吏部右侍郎明年轉左

命往科爾沁鞠台吉特古斯違禁留阿雜爾喇嘛事得特古斯及侍郎拉都渾欺飾狀具擬稱

旨尋署禮部尙書冬擢刑部尙書列議政大臣五十一年詔刑部事務至爲緊要自哈山受任斥劣員除積弊辦理之事明而不煩一應積案漸次完結其效力可嘉但意在速蕲或致草率刑名關係重大務須加意詳慎以副委任秋疏奏完結各案

優獎焉明年三月

萬壽聖節與

賜年老大臣宴

賚冠服其冬坐

特旨發遣不應援赦之流犯常明彙題釋放罷職五十八年

卒年八十有七子富明安累官總督

碩岱姓嘉塔喇氏先世居尼雅滿山有昂郭都哩巴
顏者

太祖時來歸隸滿洲正白旗順治二年碩岱以二等侍衛兼
參領隨睿親王多爾袞討大同叛鎮姜瓖復渾源州
九年從

幸南苑蒙古侍衛素尼粹拔刀斫一等伯巴什泰於

御前碩岱立舉所執槍刺仆素尼擒之

世祖嘉其勇積前功

子騎都尉兼一雲騎尉世職十五年以護軍參領隨征南將
軍卓布泰自廣西征明桂王朱由榔於貴州時其將
李定國李成蛟等分據黔西要隘率兵渡盤江進擊
連敗之梁瑞津雙河口明年大軍取雲南追定國至
騰越遇伏磨盤山率所部力戰又敗之十八年山東
土賊于七作亂隨靖東將軍濟席哈討平之事具濟
席哈傳康熙六年擢前鋒統領十二年冬逆藩吳三
桂反雲南

聖祖以荊州衝要

命率前鋒兵先諸軍進扼之俟諸軍至再前據常德以遏賊勢明年正月至荊州賊尋陷常德及澧州進犯宜昌而順承郡王勒爾錦統大軍始至碩岱奉

詔參贊軍務同護軍統領額司泰等援宜昌擊賊將劉之復

陶繼智等卻之十四年

詔責順承郡王久駐荊州郡邑多未復兼罷碩岱參贊十六年安親王岳樂自江西進圍長沙隨征南將軍穆占等移師助攻道出岳州擊賊糧艘數十於詔岡河取之既會師長沙賊負固未下

詔穆占移規衡州茶陵賊棄城走攸縣偕都統伊理布追之賊據河岸以拒進戰敗之遂復攸縣明年隨穆占復郴州永興桂陽興甯還駐郴州賊將馬寶胡國柱等犯永興偕伊理布往援戰失利伊理布及護軍統領哈克三陳汲副都統託岱等還郴州獨以所部入永興城守穆占奏劾之

詔以功贖既而賊乘勝逼攻屢瀕於危偕前鋒統領薩克察櫻城固拒閱三月三桂死乃引去十八年大軍復寶慶武岡徹八旗兵三之一還京同內大臣阿密達等率以行既至以永興戰敗罪議罷任革世職二十九

年起正白旗滿洲副都統明年隨定北將軍瓦岱征
噶爾丹至克嚕倫河偵賊遠去師還尋偕都統噶爾
瑪率兵駐大同三十五年

聖祖親征噶爾丹師出中路以撫遠大將軍費揚古出西路
費揚古請選大同所駐護軍二百八十人爲前鋒
詔署前鋒統領率之往誘賊特垺爾濟口且戰且卻至昭莫
多與大軍合圍噶爾丹僅以數騎竄去事具費揚古
傳以功擢內大臣授雲騎尉世職

聖祖念著成勞
命復前所革世職晉爲輕車都尉五十一年卒年八十有四

賜祭葬如故事子納丹珠襲海綬其第四子雍正七年以護
軍校從征準噶爾戰沒和通呼爾哈諾爾

卹贈雲騎尉世職例傳順治時人止其身國殤也變例著之
而碩岱諸父庫禮天聰崇德間大軍征討常別將朝
鮮兵以從戰比有功隨前鋒統領薩穆什喀攻明松
山北崖科爾沁蒙古兵突來犯礮傷手不退卒擊敗
之又隨睿親王多爾袞攻松山敵犯我正紅鑲藍二
旗率朝鮮將領勒卜忒與左翼軍并力以禦遂卻去
都前後所斬級以千計累

賜牲畜等物甚夥授佐領騎都尉世職順治元年定鼎燕京

兼一雲騎尉三年

命以戶部侍郎駐淮安督催漕糧既至運解如額四年明益王攻據廟灣城乘勝率兵夜逼淮安入自城垣圯處圍總漕署數周率中軍官張大志旗鼓王國印及標兵禦之家人並出助戰其妻悉索署中所有弓矢令家人子女送戰所鏖戰至曙敵眾敗陳斬其總兵以下官十有二兵二百有奇事平召同侍郎任七年以病乞休尋卒賜祭葬如例諡曰恪僖並於墓道立碑

莫洛姓伊爾根覺羅氏世居長白山之呼納赫祖温

察

太祖時來歸後隸滿洲正紅旗莫洛順治七年任刑部理事

官累遷工部郎中康熙六年擢左副都御史明年出為山西陝西總督疏請免平涼臨洮鞏昌西安延安鳳翔漢中七府興安州現戶代輸荒地額賦及平涼臨洮鞏昌三府積欠凡數十萬

聖祖並從之八年輔政大臣釐拜敗法司以有連請逮問

詔莫洛雖附釐拜念任封疆能釐剔加派火耗等弊從寬留任明年計典吏部以嘗植黨營私

聞得

旨褫職西安士庶相率籲留甘肅巡撫劉斗提督張勇柏永
馥總兵孫思克合疏陳其清以持已正以率下如革
耗羨整驛遞息詞訟練士卒清荒熟教樹畜興水利
諸政乞留任以慰民望

詔簡任督撫所以綏靖地方愛養百姓莫洛既爲民愛戴特
順輿情免其處分供職如故未幾擢刑部尙書十三年

聖祖既分命王貝勒大臣討逆藩吳三桂並
敕部臣吳逆煽亂滇黔四川從逆陝西邊陲要地西控番回
南通巴蜀幅員遼闊夙號巖疆非特遣重臣假以便宜未
易綏靖莫洛前任總督深得民心可授爲經略往駐西安

軍事悉聽調遣加銜武英殿大學士仍以刑部尙書管兵
部尙書事

賜之敕印既至部署進討尋被

詔朕聞叛鎮鄭蛟麟乞降及復朝天關甚慰近賊聚岳州值
甚雨大兵難行晴霽可水陸並進吳三桂果在澧州宜乘
勢徑襲其後如復四川卽取道交水定貴州或趨雲南其
餘諸將集議疏言逆賊堅據保甯川境未能遽復容俟奏
捷卽行相機進取並奏防禦關隘輓運軍食機宜

詔朝天關諸隘關係要害可於滿洲漢軍綠旗官兵內酌撥
防守相爲犄角護送糧艘漢中雖已駐兵恐力猶單朝天

關外尚有別路可通漢中我兵深入後姦宄竊發踞守雞頭關諸隘亦屬可虞一切機宜其酌行之又保甯未能卽復我師益勞頓輓運糧餉實爲要務其源源接濟勿令匱乏夏僞副將姚孟龍等降其賊眾據廣元百丈關者旣前遣都統馬一寶將軍席卜臣赴漢中矣別遣副都統科爾寬趨廣元又慮眾寡不敵令副都統吳國正俟馬一寶至卽移師助之尋

詔貝勒洞鄂貝子溫齊輔國公綽克託等率所部赴四川疏陳大軍久駐保甯與賊相持秦民運餉勞苦臣今赴漢中相機進勦貝勒洞鄂若率眾盡行慮致遲滯請

敕簡精銳先發速至西安

聖祖念貝勒所部無多仍令貝子公等亦各率所部進發會西安將軍瓦爾喀奏川鎮王懷忠標兵以乏餉潰請發餉增兵往援

詔莫洛大兵或仍圍保甯或糧運艱阻暫還廣元其與將軍等酌之並

命貫懷忠標兵罪速行撫納尋疏陳陝省兵單請增兵以資戰守

聖祖以增兵必須增餉或可不增兵或必當增兵或不必親行赴川令詳悉疏復復言增兵則秦得自固比四川底定

則糧餉有資而秦民亦得休息臣仍宜統兵進剿四
川從之其秋將由秦赴蜀請

敕總督周有德巡撫張德地暨科爾寬等固守朝天關廣元
諸路轉運糗糧並請

敕將軍等駐守保甯以俟兵至

詔軍機緩急莫洛自有確見可與將軍席卜臣前往廣元進
取昭化總督周有德於經略未到之先督趣糧米運送軍
前又廣元兵少或令席卜臣先赴廣元秣馬以待或與同
發俱令經略酌行俄偽將軍何德成等糾合賊眾自四川
犯甯羌立營於文廟山遣軍夜襲其營賊眾大敗遁

同南山

詔甯羌爲大兵後路卿其速援庶幾有濟旣以實

聞因令提督王輔臣遣兵守甯羌冬貝勒貝子等大兵未至
偽總兵彭時亨復屯踞七盤朝天諸關劫我略陽糧
艘廣元兵缺餉兩月賊眾旋窺陽平

聖祖慮莫洛所統皆綠旗兵巴蜀山路險惡滿洲大兵若不
繼進難於策應

敕貝勒洞鄂等兼程進會同經略入川時莫洛已率兵由漢
中赴蜀令王輔臣隨征而輔臣變先是莫洛至陝
詔遣兵征湖南輔臣請自率兵赴荊州

聖祖以征湖南兵已有貝勒等統領

命仍駐平涼聽經略調遣心旣怏怏矣至是令隨征佯言兵單給騎兵二千少之又言馬疲瘠不任用進徒死於賊搖動軍心十二月莫洛次甯羌輔臣標兵亂襲經略營率兵擊卻之輔臣以悍黨繼至礮矢並發被重創沒於軍

賜祭葬如典禮諡曰忠愍予騎都尉世職兼一雲騎尉子常安襲

格斯泰姓瓜勒佳氏世居瓦爾喀父赫勒

太祖時隨其叔祖幹珠來歸幹珠任佐領赫勒以驍騎校隸

滿洲鑲白旗崇德三年從睿親王多爾袞證明入自青山口越燕京攻獻縣樹雲梯先登克之六年襲管幹珠佐領隨貝勒阿巴泰證明自薊州南略至山東數敗敵兵順治元年豫親王多鐸追破流賊李自成於潼關明年移師平河南江南及端重親王博洛征浙江敗敵嘉興城外並在軍有功授雲騎尉世職遇恩詔晉騎都尉卒長子格森襲格斯泰其次子也初爲睿親王府一等護衛裁改護軍校隨甯海大將軍伊勒德征浙江之舟山十三年署前鋒侍衛自甯波率舟師趨定海明故將阮思陳六御等以眾三萬列二百餘

艦於海洋率所部擊卻之諸軍並進斬思與六御舟
山平得頭等功牌二康熙二十年隨都統瑪奇討逆
藩遺孽吳世璠師進自廣西連敗賊石門坎黃草壩
攻雲南城克之擢前鋒參領二十九年隨裕親王福
全征噶爾丹師次烏闌布通賊於隔岸樹林中卧駝
爲營兵伏其後內大臣佟國綱率兵進擊中槍沒格
斯泰忿甚怒馬躡賊營直入左右決盪出而復入者
再賊無敢攖會諸將繞山腰出賊後夾擊之賊潰力
追至河岸馬陷於淖死之同死者前鋒統領邁圖與
佟國綱並參贊軍務者也及護軍參領赫色巴錫巴

雅爾璘岱營總韓大任前鋒校珠旺勒等初軍出

聖祖賜護軍參領等人一馬前鋒參領未預格斯泰援以請
命自於上駟院擇之得一馬駿而白鼻或言馬誠佳然白鼻
相經所忌笑曰大丈夫以身許

國馬鼻胡爲者至是裕親王奏言當與賊戰見一將乘
白鼻馬三入敵陳眾皆識爲格斯泰云喪歸

賜祭葬如副都統例

遣侍衛奠茶酒部議予雲騎尉世職

聖祖命加一雲騎尉合爲騎都尉子幹珠罕襲乾隆十五年
詔敘八旗世職以死事贈卹而襲次已滿者

特子恩騎尉世襲罔替曾孫英福襲

薩布素姓富察氏四世祖充順巴本當

太祖時由岳克通鄂城率丁壯屯吉林遂家焉隸滿洲鑲黃

旗陳儀薩布素傳將軍姓傳茶氏自其曾祖哈木都

其先固噶哈里約克通鄂城人也始祖充舜以勇力

聞能手格猛獸而好義愛人遠近慕之嘗獨獵深山

中獲介麋焉遇札喇爾五人欲奪之舜曰誰能手拽

此去者即贈之五人互曳莫能動舜挽其角曳行踰

也重壑五益著歸附日眾乃為之分田授室人給牛

種而之約束於是所居成邑遂世為約克通鄂城

長及哈木都以所部來歸乃徙居長白山之東尋遷

盛京至公父隨哈納始授職冠百軍領一旗駐防

甯古塔撫綏老幼矜恤鰥寡不留餘貲蓋好義愛人

其家法然也閱兵使者滿河順治間薩布素由領催

以狀聞上哀異之

授驍騎校康熙十六年累遷協領皆在吉林明年擢

甯古塔副都統陳傳公為人沈勇好兵略尤喜觀山

布勢用兵不知地是奕棋不識枰也以故隘塞險阻

道里遠近多所延訪無不究悉順治九年初仕為甯

古塔將軍筆帖式康熙元年改驍騎校三年以驍騎

校擊鄂羅斯於黑喇蘇密有功署防禦七年論功遷

佐領九年將軍奉

察部族遣協領布朗阿護其行驍騎昂吳等拒命殺

我三人射傷布朗阿公請往力戰敗之追獲甚眾俘

其子女昂吳僅以身免吳蘇禮烏喇人擒送斬之十

二年論功遷協領十五年徙東地新滿洲於甯古塔

王欽部人不願徙謀潛遁公知其東有間道走徼外

乃白將軍巴海以兵繞出其東道絕遂聽徙王欽部

徙者凡二百餘戶有納喇庫等八十餘人攜孥道亡

公遣兵追擒之斬數人以徇自是無敢亡者凡徙至

甯古塔各部族共二千餘戶將軍巴海移駐吉林烏

十五戶遁公追擒之送京師十六年諾羅西喇心等處新滿洲三百戶以徙至公拊安之如前十七年巴海赴京師以公攝其軍二十一年雅克薩城之役起

越二十八年與俄羅斯定界額爾古納河北岸擢黑

龍江將軍事具郎坦傳陳傳二十一年上命

之雅克薩城詔公與俱鄂羅斯者北方大國

也延袤數千里包蒙古四十九部外東接界黑龍江

侵逼索倫鄂倫春諸部而雅克薩城其要害公既覘

其形勢遂與郎坦等至其城下指畫言可圖狀附郎

坦以聞二十二年大兵遂發公別以舟師由黑龍江

沂流而上抵特爾德尼城遇鄂羅斯八艘見我師而

遁公追及之宣上德意降七十餘人送京師

軍統兵駐阿蘇里經略鄂羅斯之事悉以委焉阿蘇

里者進取雅克薩城之要路而鄂倫春部中遮之為

之咽喉雖內附我而畏鄂羅斯之偏尙陰與之通公

欲進兵慮其為梗乃使其族長朱爾空額等諭之布

咸感悟遂殺鄂羅斯四十餘人送其首為驗公厚賞

之則復殺二十餘人自是鄂倫春與鄂羅斯相仇而

我兵進取無復卻顧矣二十三年遣兵取恆滾河鄂

羅斯遁去進至圖庫爾河獲四十七人送京師二十

四年公率兵取雅克薩城先遣精銳擊其哨兵盡擒

之大兵猝至城下用礮急攻聲振天地守將厄里克

賽莫知為計遂以城降而鄂羅斯於是失其險矣捷

聞上大喜顧念鄂羅斯大國未可猝下兵威

已振更欲以德柔服之遂釋厄里克賽同國二十五

年厄里克賽復率兵眾踞雅克薩城公奏請進剿

引兵由平武進遇其哨兵擒之遂抵雅克薩城下鄂

羅斯出戰擊敗之次日攻其城不下圍之一日大霧

公料敵必乘我乃嚴陣以待果驟出復大敗之擒生

口問城中虛實知敵已力竭城且暮且下而罷兵之

上終欲服以德不欲窮極兵威故有是命

公乃解圍去二十八年上命內大臣索額圖

國舅佟國綱率禁旅將軍薩布素帥黑龍江舟師會

吉林通志卷一百四

於厄不楚城平鄂羅斯察罕汗遣使費約多爾等求成以格爾必齊河為界東南至圖古魯河拓疆六千餘里而索倫鄂倫春諸部始有甯宇矣是年有
詔於黑龍江墨爾根二處設兵築城浚隍造廬舍開屯田皆公身執其役時喀爾喀等部為噶爾丹所襲殺越興嶺南竄索倫部復遮殺之掠其子女公聞立帥兵往救援凡收喀爾喀千餘至齊齊哈爾處以遊牧之地治索倫罪奪所掠子女悉歸之而蒙古子女為鄂羅斯所掠者亦贖歸親黨 明年疏請以前索諸番落聞之莫不感悅有泣下者
倫總管安珠瑚等所種官田二千餘畝分給墨爾根兵丁屯種
陳傳三十年以公總管索倫等部貢物公以各部生計土俗採捕之事擬為則例七條上請 三十一年與甯古塔將軍佟寶奏建齊齊哈爾城及伯都訥木城以科爾沁獻進錫伯卦爾察達呼爾壯丁萬四千有奇分駐二城編佐領隸上三旗

並設防守防禦等官三十四年應

詔陳預備進剿噶爾丹事宜曰興安嶺北形勝之地索約爾

濟山為最已遣熟識路徑官兵自

盛京吉林墨爾根三路度至山遠近分置程站其無水

處掘井以待若山之東北呼倫貝爾諸處有警則與

臣駐軍之地近即率墨爾根兵先進吉林

盛京兵繼之若山之西烏喇輝諸處有警則

盛京兵先進臣率所部與吉林兵繼之皆會於索約爾

濟山

聖祖可其奏又

詔聞噶爾丹順克魯倫河而至其卽遠行偵探儻賊犯車臣
汗地相機禦勦卽踵其尾以進三十五年

聖祖親征噶爾丹由獨石口出中路大將軍費揚古由歸化

城出西路

命薩布素扼其東路仍

詔領侍衛內大臣等曰近聞噶爾丹將東行故令薩布素整
兵設偵防其竄逸所派盛京甯古塔及科爾沁兵悉歸統
轄口外所報軍務咸使知之尋疏言各路調集之兵於四
月初由索約爾濟山趨克魯倫河其月
駕臨克魯倫河噶爾丹西竄爲費揚古所敗

詔薩布素就喀爾喀河擇好水草處秣馬未幾

命率兵一千移駐科圖餘各遣還秋

詔分所部兵五百隸費揚古軍三十六年春

召入京尋回原任秋疏報沿河被水十八莊請以舊貯糧米

按丁散給

允之初墨爾哲氏屯長札努喀布克託等率眾內遷與甯古
塔將軍巴海編爲佐領四十號新滿洲事具巴海傳
又疏請於墨爾根兩翼各立一學設助教官選新滿
洲及錫伯索倫達呼爾每佐領下幼童一名教習書
藝是爲黑龍江建學之始至是

聖祖語廷臣曰人命所關重大數年以來盜案止誅首惡從犯免死發遣黑龍江每慮聚而生事嘗聞薩布素奏言兇徒分給新滿洲為奴力散勢孤惡不能逞如此則不惟全活甚眾新滿洲亦資益良多矣三十七年疏劾錫伯達呼爾佐領阿穆瑚朗巴琳等曠誤防哨罷之秋

聖祖巡幸吉林

詔大學士等曰薩布素受任以來訓練士卒平定羅刹勤勞可嘉可予一等輕車都尉世職並以朕御袍及纓緯於眾前宣賜之

陳傳三十七年以公累戰功多美目為將軍第一賜爵阿達哈哈番承襲六世

下詔褒

明年疏劾黑龍江副都統關保罷之協領都爾岱因

訐告其濫用驛站車馬諸款疏陳訐告在劾罷後

聖祖以關保久任侍衛

詔大學士等曰薩布素辦事雖明敏朕巡幸吉林見每逢迎近侍朕聽政多年何事未厯僉王端良夫豈不辨彼近侍何能為關保各款俱實科不能袒護可即令察審尋疏覆關保疲勞驛站擬如律

命從寬降五級調用三十九年疏言黑龍江屯堡因災荒積欠米石請俟豐年陸續交倉得

旨前羅利侵擾內地是以駐兵黑龍江設立官堡遣員屯糧原欲多積米石厚備軍儲令革任總督蔡毓榮經理十二

堡薩布素曾奏皆有成效後因十二堡荒棄無收復請停止屯種將壯丁改歸驛站其餘官堡逋課日多並從前貯存倉米支散無餘致駐防兵餉匱乏薩布素難辭其咎令明白回奏尋疏言官屯耕種雖未失時而地氣早寒秋霜損稼又累經水旱不能交納官糧兵丁餬口無資因以舊存倉米按丁支放由臣庸劣不能遠謀所致至於奏停蔡毓榮所管十二屯堡耕種罪實難辭今請以齊齊哈爾墨爾根駐防兵每年輪派五百人遣往錫伯等處耕種官田督令未屆霜降悉行收穫夏秋間以船貯運至齊齊哈爾倉收存應買耕牛田器籽種先於備存俸餉內支用次年收穫扣還則糧儲裕而兵餉可充疏下戶部察議錫伯屯種事宜應如所請其以蔡毓榮荒廢屯地妄報成效又給散貯存穀石不能嚴飭兵丁屯種納糧應令賠償逋穀千二百餘石歸倉仍請

旨治瞻徇罪

聖祖命侍郎滿丕等前往察訊明年春滿丕等奏徇私捏報屯種浮支倉穀罪應死得

旨免死褫任削世職在佐領上行走尋授散秩大臣未幾卒

陳傳四十年罷凡為將軍二十載蒙
鞍馬尚食珍味甚多四十八年

賜衣裘
上追念公功

復頒賜御物公平生忠直無隱勞於國事惟力是視
用兵料敵制勝臨陣身先士卒故所向有功既以兩
戰之威讐服強敵而堅其請成之志廣斥絕徼至數
千里屬部父安而口未嘗言功歷仕數十年家無餘
財以康熙某年月日卒子幾人其官協領也
季常德忠勇有父風累官至將軍

聖祖以

本朝肇迹長白山湖厥發祥崇以秩祀禮亦宜之

敕遣內大臣覺羅武默訥前往瞻視時康熙十四年也山南
直吉林七百三十里往者折而西北可千五百里橫
互千里高二百里五峰環立中有潭曰闔門百泉所
注窈然以深東南一峰稍下如門故名三大江並源
於此東流曰圖門江西北流曰松花江西南流曰鴨

綠江而山所旁河迤西南曰

開運山又北而迤西曰

天柱山曰

隆業山龍蟠虎踞鬱鬱葱葱自餘迴環繇互方二千里
爲山爲嶺不一其名要皆支裔山海經所謂大荒之
中有山名不咸肅慎氏所國者也其夏武默訥等至
薩布素率兵二百攜三月糧導以行循溫德亨河陸
行七日至卓隆鄂河乘舟由幹努呼河逆流二日至
佛多和河順流一日抵訥殷伐木開道行三十餘里
登一高峰望見片片白光意其是矣計相去可百餘

里既復開道行一日詰朝雲霧塞徑彷彿有鶴鳴聲
 尋聲疾走因得鹿蹊林木叢翳進至山麓跪誦
 敕旨雲霧遂開山半坦若石磴平臺五峰外抱闔門潭淵然
 其間緣潭陟山可五十餘丈徧地皆雪則曩所望片
 片白光也蒼茫四顧邈無人蹤肅拜而返返至山麓
 有鹿奔墜者七與伫視人數適符有若神餉行數武
 迴望雲霧彌山矣武默訥歸奏
 敕禮臣詳議封曰長白山之神秩祀如嶽鎮春秋望祭於吉
 林城西南九里温德亨山著為典山蔚然深秀饗殿
 在焉亦曰小白山蓋長白亦名太白云

吉林通志卷一百五

人物志三十四 國朝十九

哈占 莽依圖

莫羅渾 弟色勒布 鼇貝 杜敏

布恕庫 族人敦達禮 華善 扈圖 巴薩哈

對喀納 馬祐

哈占姓伊爾根覺羅氏世居葉赫隸滿洲正黃旗順
 治間由官學生游任兵部督捕理事官康熙八年授
 秘書院學士十一年擢工部侍郎明年授陝西總督
 甫之任逆藩吳三桂反四川巡撫羅森提督鄭蛟麟

總兵吳之茂譚宏應之與三桂所遣偽將軍王屏藩
合謀寇陝西

聖祖命都統赫葉爲安西將軍同西安將軍瓦爾喀等進討
詔哈占與巡撫杭愛籌運軍餉十三年

命尙書莫洛經略陝西凡事與酌議哈占疏陳漢中廣元山
路險峻於略陽水道造船接運並借山西穀二十萬
石協濟夏貝勒洞鄂奉

命爲定西大將軍統征四川諸將而叛鎮楊來嘉自鄖陽結
王屏藩等犯興安時興安總兵王懷忠率兵隨將軍
瓦爾喀征保甯哈占遣遊擊程福代守禦賊漁渡路

敗之秋疏言洞鄂自秦州進兵四川略陽糧艘爲賊
所劫餽運難繼

詔四川總督周有德經理廣元至保甯運道
命哈占飭屬速運廣元因疏陳陝西官民疲於輓輸請令山
西協助

詔山西運糧水路有黃河汾渭諸險陸路道遠勞費尤甚戶
部發庫銀十五萬兩遣員賫至西安採辦酌增其直閒獲
什一之利樂於輸送自可源源接濟冬陝西提督王輔臣
反甯羌莫洛遇害洞鄂自漢中還軍西安明年

詔洞鄂征秦州哈占分兵守蘭州疏言西安兵少不宜分遣

因請增兵

命移荊州兵一千以雲貴總督鄂善率赴西安尋

詔鄂善移兵守延安疏留之時同州遊擊李師膺叛殺韓城

知縣翟世琪脅神道嶺營卒結蒲城土賊陷延安而

固原道陳彭定邊副將朱龍並以城反輔臣據平涼

其黨分據秦州鞏昌慶陽陷蘭州洮州河州復阻棧

道陷漢中遣將分勦邠州涇化三水長武漢陰石泉

甘泉寶雞諸賊屢捷夏洞鄂復秦州提督張勇復鞏

昌洮州河州甯夏提督陳福復定邊平逆將軍畢力

克圖復延安西甯總兵王進寶復蘭州

詔洞鄂督諸路兵合攻平涼哈占疏言興安遊擊王可成反

移潼關綠旗兵守商州移西安滿洲兵守潼關又興

安叛兵與巴寇合陷商州舊縣關逼西安南山羣盜

亦各出口請

敕洞鄂畢力克圖發兵赴西安應援

聖祖切責之曰始王輔臣反朕以蘭州爲近邊要地令發兵

鎮守謂西安兵少不宜分遣致蘭州等處淪陷嗣以延安

諸路要衝命鄂善周有德等駐守又留之西安致延安陷

沒身爲封疆大臣遇事不周詳籌度祇欲重兵自衛又謂

叛兵與蜀寇合欲諸將分兵赴西安是但知有西安置各

處於度外矣且蜀寇何能卽至西安因諸將齊赴平涼故
聲言欲亂我軍心分我兵勢耳諸將當急攻平涼現駐太
原之兵令將軍烏丹率守潼關現駐榆林之蒙古兵合理
藩院員外郎拉篤祜率赴西安以備勦禦秋慶陽知府王
文紳守備路調鼎反正擒偽總兵南一元以城降疏

聞十五年

命大學士圖海代洞鄂爲大將軍圍攻平涼降輔臣哈占疏
陳安輯降眾及善後事宜如所議行十七年以失察
布政使伊圖採買價直應革職
詔從寬留任十九年春將軍趙良棟王進寶復成都保甯四

川郡邑以次底定疏言軍餉由陝西運至保甯應令
四川官屬接運

聖祖以四川初定恐難驟供轉餉

命陝西運官以略陽糧艘運至敘州秋

詔簡本標及綠旗各營精銳率赴保甯規復雲南貴州冬疏

言進兵保甯糧餉若但資陝運不足支給請

命四川督餉官悉心經理又言叛賊譚宏彭時亨等四出剽

掠臣自漢中趨保甯所統無幾請

敕陝西甘肅巡撫提督撥兵略陽陽平甯羌廣元諸要地防

守

允之會侍郎趙璟金鼐疏陳陝西轉餉入蜀運官不知軫恤
人民滋困尙書宋德宜言陝西四川宜以一總督經
理庶人民勞逸可劑其平於是裁四川總督以哈占
爲川陝總督既至保甯遣總兵高孟擊彭時亨於南
溪羅石橋等處敗之復營山縣渠縣尋疏言臣奉
命督川陝或應率兵進征或駐兩省適中之地調遣策應
詔速滅譚宏彭時亨卽進攻雲南明年春鎮南將軍噶爾罕
疏言譚宏已死忠州萬開建始雲陽梁山等縣賊巢
俱平高孟追擊時亨亦復廣安州達州大竹東鄉等
縣

詔哈占率所屬馳赴敘州會建昌永甯兩路軍同進疏言永
甯一路大兵急需糧餉陝西輸運困敝請以西安庫
銀六萬兩遣員賫往永甯瀘州諸處採買支給
俞之夏疏言臣兵發永甯由赤水畢節追剿逆賊馬進寶進
規雲南兵單力弱請令現駐敘州之固原總兵王用
予爲後應

詔用予卽率兵馳守永甯時湖南廣西大兵齊集雲南合圍
會城貝子章泰以兵多糧少疏言馬進寶既降賊勢
窮蹙大兵已足用哈占兵甫至貴州威甯宜令還四
川以節滇餉因

命擇駐要地兼顧川陝開復前革職處分尋以時亨窮蹙來降加兵部尙書銜初譚宏旣死其黨僞總兵牟一乾牟一舉率眾赴遵義降於提督周卜世其眾散處巴縣涪州至是哈占疏言一乾等素奸狡若留舊地恐復爲患請移之陝西強壯者於各營分隸懦弱歸農聖祖嘉協機宜如所請又言慶陽協所轄潼關商州神道嶺金鎖關四營距慶陽道遠應歸固原鎮統轄富平營分防六縣汎廣兵單宜分郿縣營兵百增隸之亦如所請二十二年授兵部尙書二十四年調禮部冬乞休自陳前羣逆作亂思捐軀自效晝夜拮据者十年

積勞成疾

詔前任川陝總督大兵征雲南數加催促始隨他人之後前往未嘗立功乃妄稱欲捐軀自效因嚴飭之命仍效力供職以贖前愆明年秋卒官年五十有五

莽依圖姓兆佳氏世居瑚布察隸滿洲鑲白旗父武達禪崇德三年隨睿親王多爾袞征明攻直隸任邱山東濟陽並先登克之

賜號巴圖魯授騎都尉世職任太原城守尉順治七年遇

恩詔兼一雲騎尉卒莽依圖襲九年兩遇

恩詔晉世職輕車都尉十五年隨征南將軍卓布泰征明桂

王朱由榔至貴州明年師自都勻至盤江其將李定國悉三十營列雙河口爲象陳拒戰以步軍擊破之因定雲南康熙二年隨靖西將軍穆里瑪征湖南流賊李來亨賊據茅麓山盲矢石攻之破賊寨二又數敗賊來亨窮蹙自經死積功授江甯協領十三年逆藩吳三桂反陷湖南郡邑隨征南將軍尼雅翰率師規岳州以紅衣礮擊沈賊舟戰七里橋復敗之明年三桂遣其黨董重民結叛鎮馬雄犯廣東平南王尙可喜疏請援兵

詔尼雅翰移師往莽依圖署副都統駐守肇慶十五年可喜

子之信叛降三桂三桂黨范齊韓等來逼總督金光祖降賊倉卒率所部突圍出且戰且走還駐江西僞將軍黃士標等犯信豐往援之與城中夾擊賊遁追敗之山後明年授江甯副都統時董重民尙據廣東聖祖命爲鎮南將軍率師恢復以副都統額赫訥署副都統穆成額參贊軍務師進南安僞將軍嚴自明以城降至南雄降僞將軍宋思政僞總兵郭茂威等之信亦擒重民夏疏言南安南雄韶州所屬文武官弁昔迫賊勢致汙僞職今旣望風款附若悉與更張非所以安反側請令暫留原任綏撫殘黎

特允所請且

獎其進兵迅速尋

命翰林院侍讀學士顧八代至軍傳

諭勦賊一切擇便而行時賊將胡國柱馬寶以眾萬餘犯韶

州擊卻之秋賊復於河西斷我水運餉道列營蓮花

山以瞰城中會將軍額楚自江甯率軍至城中出與

夾攻破其四營多所斬獲賊走帽峰山乘夜追擊大

敗之河西賊亦遁水運乃通冬躡賊至樂昌賊據風

門澳以守我軍三路仰攻別令獠兵由閒道夾擊斬

獲二千有奇進定仁化仍回駐韶州疏言傳宏烈以

五千人獨當西路恐力不支已遣副都統額赫訥赴

梧州助之

詔賊犯韶州將軍莽依圖同額楚大敗之復追擊於仁化諸

縣指揮悉定可謂智勇兼資凡爲將者統兵滅賊底定疆

圉不必一一拱俟中旨惟應機適變盡乃心力斯克副委

任至逆賊甫遁卽遣副都統額赫訥往援粵西尤可嘉尙

十七年三桂遣其孫吳世琮陷桂林馬寶亦由宜章

陷平樂

詔赴廣西與傅宏烈會師疏言臣抵平樂圍其城賊水陸拒

阻宏烈所統綠旗兵與戰不勝臣所遣軍難以久留

因退駐中山鎮而宏烈亦以莽依圖所統滿洲兵不
相應援入奏

聖祖念擊賊失利因江水泛漲並免罪仍

詔和衷尋以賊逼賀縣回梧州乞罷將軍任

切責之仍留任以功贖明年世琮犯梧州偕宏烈與戰大敗
之賊棄營走先是偽將軍馬承蔭以南甯降賊自梧
州敗走遂犯南甯城中食盡旦夕陷時方卧病聞之
卽督師倍道往援賊悉銳阻西山列鹿角拒戰額楚
額赫訥以前鋒軍擊之賊小卻莽依圖與將軍舒恕
磨軍益進而豫遣左翼兵潛出山後截賊盡殪之世

琮負重創以數十騎越山遁南甯圍解

聖祖以廣西平

命進取雲貴念承蔭雖降心叵測將爲肘腋憂疏言湖南大
兵於武岡禦賊臣等一軍先進雲南恐諸路兵不能
相應且廣西新定若無兵駐守恐有他虞

詔簡親王喇布鎮桂林莽依圖俟都統希福兵至卽發十九
年授護軍統領夏承蔭反柳州率師討之次來賓承
蔭列象陳拒戰我軍射以勁弩象回奔賊陳亂乘勢
力擊賊敗走自以輕騎追之斬馘甚夥獲象三會簡
親王與總督金光祖兩路軍亦捷承蔭復降柳州平

秋卒軍年四十有七莽依圖疏寬陷賊文武微特識
機達變也抑亦仁心爲質及策馬承蔭之反又何神
哉而身後追論自平樂退梧州坐失機應籍家產半
褫

恩詔所得騎都尉世職

聖祖以著有勞績且所至軍民皆稱其善

命免籍沒但削去世職而原襲騎都尉兼一雲騎尉以其弟

博和哩襲仍祀廣西名宦祠

世宗又詔入祀京師賢良祠

高宗又追諡襄壯於以見

列聖褒功之典雖遠不遺足慰勞臣於地下而當時吏議何
其嚴也

莫羅渾姓吳扎喇氏世居虎爾哈祖薩鈕

太祖時來歸任佐領隸滿洲正紅旗卒父赫葉諾繼其職崇
德四年從征黑龍江多所俘獲六年從圍明錦州敵
兵襲奪我紅衣礮率兵擊卻之又敗松山騎兵來犯
我右翼者順治元年從入關破流賊李自成夏從征
山西至獲鹿遇土寇三戰皆捷進軍陝西圍延安府
賊出犯我輜重借諸將擊敗之三年授雲騎尉世職
卒莫羅渾襲七年九年三遇

恩詔晉世職輕車都尉十一年駐防杭州有土寇爲亂偕參領巴思堪討平之鄭成功以舟師萬餘犯紹興府復偕巴思堪往禦斬其副將一獲船三百尋隨靖南將軍珠瑪喇征廣東擊明桂王將李定國兵於新會縣敗其眾四萬有奇積功晉世職二等康熙十六年隨甯海將軍拉哈達征成功於福建敗其將趙得勝何祐等於太平山明年其將軍劉國軒犯海澄率兵往拒戰甚力以無援殉焉

卹晉世職一等色勒布其弟也順治元年以佐領從豫親王多鐸追流賊於潼關數敗山寨之眾又於關外連爲軍殿並捷明年移師江南土寇起溧陽隨都統圖賴擊破之尋守瓜州渡有賊來犯逆擊卻去從攻江陰中礮沒當時野史盛稱明典史閻應元守孤城八十日且礮殞名王而主名不得豈卽謂色勒布耶然偏裨非其人也雖然兄弟戮力並爲國殤卽微其可沒乎事

聞積戰功贈輕車都尉世職子額色襲數從征伐以功兼三遇

恩詔晉二等男爵

鼇貝姓富察氏世居輝發隸滿洲鑲紅旗順治元年

以佐領隨睿親王多爾袞入山海關破流賊李自成追敗之望都予雲騎尉世職冬隨豫親王多鐸追討自成至潼關連戰皆捷明年移師江南破敵蕪湖縣三年隨貝勒博洛征福建敗其總兵黃某進戰泉州府三接三勝殲步騎六百有奇至南安縣偕奇爾塔巴擊城中兵出拒者敗之奪門直入立克其城晉世職騎都尉七年九年三遇

恩詔晉二等輕車都尉十一年從征廣東偕護軍統領賚塔副都統畢力克圖擊明將李定國於新會縣大敗其眾晉世職一等歷官至副都統杜敏者世居塔塔喇

以地爲氏與鼇貝同旗順治元年從入關破流賊李自成尋轉戰陝西湖廣及攻克芮城縣並有功予雲騎尉世職九年再遇

恩詔晉世職騎都尉兼一雲騎尉十五年從征貴州敗明總兵羅大順者二康熙三年從征流賊袁宗第郝搖旗於四川湖廣並擒之晉世職二等亦歷官副都統卒子蘇敏襲十七年從征雲南以功晉世職一等

布恕庫世居葉赫隸滿洲正黃旗故姓文車亨氏後賜姓吳魯父那爾泰以戰功予雲騎尉世職順治六年從征

叛鎮姜瓖戰沒於大同二子噶達渾與姓納喇氏者同名那爾

庫亦在行間慟父之死聯騎入賊陳多所殺傷遂並
殉焉一門忠孝而

卹贈未之聞微專閩者過卽史氏失之矣悲夫時布恕庫從
討江西叛鎮金聲桓攻饒州府先登克之子雲騎尉
世職十五年從征貴州敗明將李成蛟於涼水井師
旋擢佐領直宿左翼門

世祖欲幸上駟院呼令啟門以夜不奉
詔翼日下慎刑司鞭百尋

召至景山

世祖獎之曰前朝帝者出畋於郊夜歸闈人不納從者曰上

也對曰夜莫能辨不得已從他門入翼日厚賞之汝武人
不知書所行竟與古合朕彼時未思故罪爾於是

特賜內廐馬一康熙九年遷參領十三年吳三桂反八旗都

統及副都統悉統師以出其印令本旗參領署理尋
收其七令大臣兼管以布恕庫公正其印獨留異數
也十六年擢本旗蒙古副都統列議政大臣

命赴簡親王喇布軍助討三桂瀕行入

見養心殿以刀一

賜之曰簡親王年幼未諳軍事將士臨敵有不用命者卿卽
以是刀先斬後奏復

賜御膳及弓矢等物令侍衛桑格掖詣

太皇太后宮請安

太皇太后賜御膳及銀三百兩又乳餅一囊內監崔邦起傳旨曰副都統年高今炎天出征口乾啖此可止渴卽以是囊

盛賊首歸明年至江西擊敗偽將軍韓大任分兵躡入福

建境大任詣康親王傑書軍降夏大軍進湖廣率前

鋒軍與諸將拔全州道州及新田東安湘陰諸縣進

取永州戰白水市哲里橋蔡家店遂復府城三桂兵

圍永興壁城下三閱月我兵攻之不克其黨胡國柱

馬寶侵曉以眾三萬來犯督所部合大軍力戰至夜

始敗去十九年調滿洲副都統遣兵廣西拔興安雜

容諸縣平柳州降叛鎮馬雄子承蔭以積勞卒於軍

喪還京師

聖祖遣大臣及侍衛迎奠

賜祭葬如故事於墓道立碑諡曰剛壯族人敦達禮

與姓郭爾羅斯

者同崇德三年隨貝勒岳託證明攻定興縣先登克

之子雲騎尉世職六年從

太宗圍明松山敵中有介馬掠陳者一矢殪之

賞丁口十二順治九年兩遇

恩詔晉世職騎都尉兼一雲騎尉十一年從征湖廣廣東有

功晉輕車都尉卒次子桑格分襲騎都尉兼一雲騎尉以功晉輕車都尉

華善姓伊爾根覺羅氏世居佛阿喇隸滿洲鑲黃旗順治初以官學生游仕吏部主事擢刑部郎中明將阮思陳六御等擁眾浙江舟山以本官參甯海大將軍伊爾德軍事往征之戰海上兩陳方合颶風起奔濤山立敵戰艦乘風逼我礮矢雨集擁盾以刀麾所乘舟逆進去敵艦丈許大呼擲盾躍登之敵矛攢刺格以刀一矛洞腹入腸隨出適有稻稭左取塞創右刃刺腹者首墜矣又斬一人創三人所部繼登擒其

渠降餘眾百計會得千金藥創平舟山亦定擢太僕寺卿予雲騎尉世職尋遷內閣學士兼禮部侍郎銜

康熙九年

特命巡撫甘肅十二年冬逆藩吳三桂反雲南川陝多叛應明年春肅州兵變走涼州秋集眾復之十五年卒官同旗曰扈圖曰巴薩喀扈圖姓瓜爾佳氏世居蜚悠城順治初以前鋒參領從征福建戰勝分水關六年從征湖廣戰衡州府草橋南山岡雙橋皆勝尋移軍山東以紅衣礮攻曹縣冒煙燄闖飛石先登克之以功兼九年再遇

恩詔授騎都尉世職兼一雲騎尉歷官至前鋒統領康熙十

四年以老乞休次子積爾薩襲長子穆圖亦以戰功
予雲騎尉世職官前鋒統領巴薩喀姓巴牙喇氏世
居虎爾哈諸父夸克他哈率族於

國初來歸以功授騎都尉世職順治元年卒巴薩哈襲
五年從征湖廣流賊一隻虎犯荊州力戰敗之洊擢
參領駐防杭州紹興府以警告率兵往援戰城下及
海岸連勝獲船百燬三百餘復敗之牛頭山沙土村
都門村等處山東土賊起隨大軍會剿破之恩縣戰
齊河平陰並捷十一年從征廣東明將李定國據新

會縣隨靖南將軍珠瑪喇連敗其眾積功兼七年九
年三遇

恩詔晉世職至男爵

對喀納姓鈕祜祿氏世居瑋春兄班布里
國初率眾來歸隸滿洲正藍旗以戰功授二等輕車都
尉世職順治二年對喀納由筆帖式任工部主事九
年擢郎中十一年遷刑部啟心郎十五年缺裁十七
年授都察院左副都御史遷刑部右侍郎康熙二年
轉左四年擢本部尙書應

詔言事略謂年來奸民專以訐告爲事凡控於部院及叩闈

多稱藏匿于七及其黨事關叛案不得不准株連蔓引貽害無辜及鞠明被誣家產已盡請嗣後凡稱于七一案者概不准行庶奸惡之徒不得假借叛名誣陷良善

詔如所請七年擢內

國史院大學士充

世祖實錄總裁官明年加太子太保銜兼管吏部尙書事十三年以病乞罷

溫詔慰留明年卒於官

賜祭葬如故事諡曰文端二十八年

聖祖駐蹕內運河詢知其墓

遣領侍衛內大臣費揚古奠焉

馬祐姓哲伯氏世居漢楚哈隸滿洲鑲紅旗

太宗初設官學命八旗習漢文因入學肄業順治九年成進士選爲敬謹親王教習官品視騎都尉尋擢刑部員外郎時初設欽天監滿官以爲欽天監監正康熙八年

特授江甯巡撫

陛辭日

賜御饌及衣服鞍馬十一年疏言高郵興化等州縣連年水

災蒙

恩屢次蠲賑保全災黎今歲新涸田地勸民播種二麥將成
不意清水潭決田廬仍被淹沒前部覆督臣麻勒吉
所請蠲賑令於本年四月停止今各州縣田地復遭
淹沒涸出無期民食維艱視昔愈甚懇請照常賑濟
俟水涸可耕再行停止

俞之十五年卒官

賜祭葬如故事諡清恪於墓道立碑

稱其性行清廉材能敏練簡任巡撫實能率屬惠民云

